

Ո Ր Ո Շ ՈՒ Մ թիվ-354
վարչական տույժ նշանակելու մասին

«25» նոյեմբերի 2021թ.

ք. Երևան

ՀՀ պետական եկամուտների կոմիտեի իրավաբանական վարչության պետ Ա. Մնացականյանս, քննելով Մոհամմադ Բաբաեիեդանի վերաբերյալ նյութերը՝

Պ Ա Ր Զ Ե Ց Ի՝

2021 թվականի հոկտեմբերի 19-ին ՀՀ ՊԵԿ Հարավային մաքսատուն-վարչության աշխատակիցները Մեղրիի մաքսային կետ-բաժնի տարածքում զննության են ենթարկել ԻԻՀ-ից ՀՀ ժանանած, Մոհամմադ Բաբաեիեդանի կողմից շահագործվող «MAN» մակնիշի, 55 AA 721/2 հաշվառման համարանիշի բեռնատար ավտոմեքենան, ինչի արդյունքում, նշված բեռնատար ավտոմեքենայի խցիկում՝ քնելու համար նախատեսված հատուկ հարմարեցված թաքստոցից, հայտնաբերել են մաքսային հսկողությունից թաքցրած 20 տուփ (բլոկ) «Cobra» և 16 տուփ (բլոկ) «West» գրառումներով ծխախոտ և 11 հատ կոստյում:

Փաստի առթիվ վարորդ ԻԻՀ քաղաքացի Մոհամմադ Բաբաեիեդանի նկատմամբ ՀՀ մաքսային օրենսգրքի 201-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն, իսկ իրավախախտման անմիջական օբյեկտ համարվող վերոնշյալ ապրանքները ի պահ են հանձնվել Մեղրիի մաքսային կետ-բաժնի մաքսային հսկողության տարածքում:

Վարչական վարույթի ընթացքում 01.11.2021թ-ի թիվ Ն.11-3/196881-2021 գրությամբ հարցում է կատարվել ՀՀ ՊԵԿ Հարավային մաքսատուն-վարչություն ճշտելու 11 հատ կոստյումի մաքսային արժեքի և վճարման ենթակա մաքսային վճարների չափը:

ՀՀ ՊԵԿ Հարավային մաքսատուն-վարչության 02.11.2021թ-ի թիվ Ն22-1/197735 գրության համաձայն՝ 2021թ հոկտեմբերի 19-ի դրությամբ «բացթողում ներքին ապառման համար» մաքսային ընթացակարգով հայտարարագրելու դեպքում 11 հատ կոստյումի մաքսային արժեքը կկազմի 722143 ՀՀ դրամ, իսկ մաքսային վճարները՝ 176499 ՀՀ դրամ, որից մաքսատուրք՝ 26725 ՀՀ դրամ, ԱԱՀ՝ 149774 ՀՀ դրամ:

Վարչական վարույթի ընթացքում 03.11.2021թ-ի թիվ Ն.11-3/198660-2021 գրությամբ հարցում է կատարվել ՀՀ ՊԵԿ Մաքսային հսկողության վարչություն ճշտելու 20 տուփ (բլոկ) «Cobra» և 16 տուփ (բլոկ) «West» գրառումներով ծխախոտի մաքսային արժեքի և վճարման ենթակա մաքսային վճարների չափը:

ՀՀ ՊԵԿ Մաքսային հսկողության վարչության 05.11.2021թ-ի թիվ Ն8-1/199860 գրության համաձայն՝ 2021թ հոկտեմբերի 19-ի դրությամբ 20 տուփ (բլոկ) «Cobra» և 16 տուփ (բլոկ) «West» գրառումներով ծխախոտների մաքսային արժեքները ընդհանուր կկազմի 126000 ՀՀ դրամ:

ԵԱՏՄ մաքսային օրենսգրքի 2-րդ հոդվածի 1-ին մասի 25-րդ կետի համաձայն՝ «Միության մաքսային սահմանով ապրանքների անօրինական տեղափոխում» է համարվում ապրանքների տեղափոխումը Միության մաքսային սահմանով այն վայրերից դուրս, որոնցով, սույն Օրենսգրքի 10-րդ հոդվածին համապատասխան, պետք է կամ կարող է իրականացվել ապրանքների տեղափոխում Միության մաքսային սահմանով, կամ այդ վայրերում գտնվող մաքսային մարմինների աշխատանքային ժամանակից դուրս, կամ մաքսային հսկողությունից թաքցնելու կամ ապրանքների ոչ հավաստի հայտարարագրման կամ չհայտարարագրման կամ ապրանքների վերաբերյալ ոչ հավաստի տեղեկություններ

պարունակող փաստաթղթեր օգտագործելու միջոցով և (կամ) նույնականացման՝ կեղծ կամ այլ ապրանքներին վերաբերող միջոցներ օգտագործելու միջոցով:

ՀՀ մաքսային օրենսգրքի 189-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 201-րդ հոդվածի համաձայն՝ Հայաստանի Հանրապետության մաքսային սահմանով ապրանքների տեղափոխումը՝ մաքսային հսկողությունից թաքցնելով, այսինքն՝ գաղտնարանների օգտագործմամբ, ապրանքների հայտնաբերումը դժվարացնող այլ եղանակներով կամ ապրանքներին այլ տեսք տալու միջոցով՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ այդ ապրանքների մաքսային արժեքի չափով:

ՀՀ մաքսային օրենսգրքի 219-րդ հոդվածի համաձայն՝ մաքսային կանոնների խախտման վերաբերյալ գործը քննվում է վարչական պատասխանատվության ենթարկվող անձի մասնակցությամբ: Գործը կարող է քննվել նաև տվյալ անձի բացակայության դեպքում, եթե քննության տեղի ու ժամանակի մասին սահմանված կարգով նրան տեղյակ է պահվել, սակայն վերջինիս կողմից որևէ միջնորդություն չի հարուցվել, կամ եթե անձը բացակայում է, և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

Մոհամմադ Բաբաեիեդանը 2021 թվականի նոյեմբերի 25-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 201-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն ՀՀ մաքսային օրենսգրքի 219-րդ հոդվածի՝ չներկայանալու դեպքում վարչական գործի քննությունը կիրականացվի առանց իր մասնակցության, սակայն վերջինս չի ներկայացել:

Այսպիսով, նյութերով պարզվել է, որ 2021 թվականի հոկտեմբերի 19-ին Մոհամմադ Բաբաեիեդանին մաքսային հսկողությունից թաքցնելով՝ բեռնատար ավտոմեքենայի խցիկի քնելու համար նախատեսված վայրում, ՀՀ մաքսային սահմանով տեղափոխել է ընդհանուր՝ 848143 ՀՀ դրամ մաքսային արժեքով ապրանք, այսինքն՝ Մոհամմադ Բաբաեիեդանը թույլ է տվել ՀՀ մաքսային օրենսգրքի 201-րդ հոդվածով նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ արձանագրությամբ, ՊԵԿ Հարավային մաքսատուն-վարչության 02.11.2021թ-ի թիվ Ն22-1/197735, ՊԵԿ Մաքսային հսկողության վարչության 05.11.2021թ-ի թիվ Ն8-1/199860 գրություններով և 19.10.2021թ-ի մաքսային զննման ակտով:

Վերոգրյալի հիման վրա և ղեկավարվելով ՀՀ մաքսային օրենսգրքի 201-րդ հոդվածով, 206, և 221, 224-րդ հոդվածներով,

Ո Ր Ո Շ Ե Ց Ի՝

1. Մոհամմադ Բաբաեիեիդանին (հասցե՝ ԻԻՀ, ք. Մահարադ Ազադեզան փողոց, տուն 27, անձնագիր՝ Z48561905) ճանաչել զանցառու ՀՀ մաքսային օրենսգրքի 201-րդ հոդվածով և նրան տուգանել թաքցնելով ՀՀ մաքսային սահմանով տեղափոխված վերոնշյալ ապրանքների մաքսային արժեքի չափով ընդհանուր՝ 848143 ՀՀ դրամի չափով:

/վճարումը 900005024055 հաշվեհամարին/

2. Վերցված ապրանքները կարող են վերադարձվել մաքսային ձևակերպումները կատարելուց, տուգանքի վճարումից, մաքսային վճարների և պարտավորությունների կատարումից հետո՝ մեկ աշխատանքային օրվա ընթացքում:

3. ԵԱՏՄ մաքսային օրենսգրքի 98-րդ հոդվածի 4-րդ մասի համաձայն՝ որոշումն ուժի մեջ մտնելու օրվան հաջորդ օրվանից ոչ ուշ, քան 10 օրացուցային օրվա ընթացքում վերցված ապրանքները պետք է հանձնվեն ժամանակավոր պահպանման:

4. Որոշման մասին հայտնել Մ.Բաբաեիեիդանին՝ պարզաբանելով ՀՀ մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ դա կայացնելուց հետո 10 օրվա ընթացքում կամ ՀՀ վարչական դատարան երկու ամսվա ընթացքում:

**ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ**



ԱՐՄԱՆ ՄՆԱՅԱԿԱՆՅԱՆ